

Zefir BOSC (per son cap de l'an lo 27 de novembre de 2021 a Espeirac)

Zefir Bosc nasquèt a Banròcas dins la comuna d'Enguialés lo 1<sup>er</sup> de decembre de 1927.

Siaguèt postier dins son trabalh. Se retirèt a Espeirac ont faguèt son ostal.

Avià un fraire besson que se sonaba Maurici.

Se maridèt a la Vinzèla ambe Marineta Olhada ; sus la foto de son maridatge, l'òn vei Zeliá

Pojada que era de la parentat ambe Marineta.

Ajèron tres enfants.

Zefir nos quitèt a l'atge de 93 ans, lo 25 de novembre de 2020 ; es enterrat a Espeirac.

Zefir èra un òme saberut, coneissiá fòrt plan l'istòria de Roèrgue, legissiá a la perfeccion los texts ancians, aviá naturalament lo gèni de nòstra lenga occitana. Coneissiá mai particulieirament son país d'Entraigas, la rivièira d'Olt, l'Aubrac, lo trabalh de la tèrra e de la vinha.

De sas coneissenças, n'en tirèt fòrces libres, aquela tièira es longa e diversa: contes, racontes, dichas, istòrias, estudis, cants e poèsias...

A tradusit dins nòstra lenga los sentiments mai resconduts de l'arma umana dels òmes de duèi.

Ajèt de nombrosas responsabilitats dins mai d'una associacion. Siaguèt lo secretari del Grelh pendent un crane temps, devenguèt Capiscòl del Grelh pendent de nombrosas annadas, siaguèt eligit majoral del Felibritge en 1980.

Al nom del Grelh Roergàs, duèi centenari e nascut a La Vinzèla, al país de sa femna Marineta, al nom de sos aderents: podèm dire un crane mercés a Zefir!

Albert Bibal